

## KABAKTIANG MINGGU KALIMA

### SIAP-SIAP

- Jamaat balajar lagu-lagu
- Sombayang di konsistori
- Majalis baca barita jamaat
- Alat-alat musik babunyi par jadi tanda kalo ibada hari Minggu pagi ka malang su mulai (*bisa pake kampinjang yang babunyi 3x, ka gong, ka tifa, ka tahuri, ka toleng-toleng, ka yang laeng*) la jamaat langsung badiri. Waktu itu, orang-orang yang pung tugas dalang ibada (*majalis yang pung tugas, pandita, majalis jamaat yang laeng, orang yang baca Alkitab, deng kolektan*) maso ka tanpa ibada.

### 01. DONCI PUJI TUHAN

Pmp Lagu : (*Maso ka tanpa ibada la langsung badiri di muka jamaat la bilang Syalom/Pagi Bae/Malam Bae par jamaat. Abis itu, dia undang jamaat par manyanyi satu dua lagu gerat seng putus-putus.*)

Pdt : **Tuhan ada deng Katong** deng **Bilang Tabea** (*Bisa pake kata-kata sandiri ka baca yang su siap, macang "Basudara jamaat samua! Ibada yang katong biking ni, akang jadi deng nama Allah yang biking langit deng dunya."*)

Pmp Lagu : (*Pimping jamaat par manyanyi satu lagu. Waktu jamaat manyanyi, bisa jua ada orang yang manari.*)

(Langsung dudu)

Pdt : (*Undang jamaat par baca Alkitab dari kitab Lagu Puji Tuhan<sup>1</sup> **baku ganti**.  
Conto sa dari Lagu Puji Tuhan 150:1-6.*)

Pmp Lagu : (*Pimping jamaat par manyanyi satu lagu par puji Tuhan. Waktu jamaat manyanyi, bisa jua ada orang yang manari.*)

### 02. MARI KANAL DIRI DENG HIDOP IKO TUHAN PUNG MAU

Pdt :

- (1) Minta jamaat par *kasi siap diri* par buka hati deng inga-inga dong pung dosa-dosa. Waktu itu, ada orang yang barmaeng lagu satu palang-palang dari buku-buku lagu yang bisa pake di GPM.
- (2) Minta jamaat par *inga-inga* dong pung dosa-dosa.
- (3) Minta jamaat par manyanyi lagu satu yang bicara soal *minta Tuhan kasi unju Antua pung hati bae*.
- (4) Minta jamaat par sombayang *mangaku* dong pung dosa-dosa sandiri-sandiri.
- (5) Minta jamaat par manyanyi ulang lagu yang bicara soal *minta Tuhan kasi unju Antua pung hati bae*.
- (6) Minta jamaat par sombayang *minta Tuhan kasi ampong dong pung dosa-dosa*.
- (7) Kasi nasehat-nasehat soal bagemana jamaat bisa hidop iko Tuhan pung mau. (Nasehat-nasehat tu macang dari : 2 Korintus 5:17; Efesus 4:16; Kolose 3:9-10; ka dari ayat-ayat yang laeng lai.)

### 03. MANYANYI PAR PUJI TUHAN

(*Koor/VG/Solo/Trio/Manyanyi baku balas/ka yang laeng*)

### 04. SOMBAYANG MINTA TUHAN PUNG ROH TOLONG

Pdt : (*Bisa ganti deng orang laeng, ka bisa jua solo, ka koor, ka jamaat manyanyi par jadi sombayang.*)

### 05. BACA ALKITAB : (*Bisa pandita, majalis jamaat, ka jamaat satu orang*)

(*Abis baca Alkitab, jamaat manyanyi:*)

- a. Haleluya, Haleluya, Haleluya (*Par Minggu Biasa, Tuhan Yesus Hidop Kombali,*

---

<sup>1</sup> Ini kitab Mazmur.

- Tuhan Yesus Nai ka Sorga, Tuhan pung Roh Turung, deng Kajadiang)*
- b. Hosiana, Hosiana, Hosiana (*Par Minggu Sangsara*)
  - c. Maranata, Maranata, Maranata (*Par Minggu Adventus*)

**06. RIWAYAT : (Pandita)**

*(Bisa pake tonel, puisi, lagu-lagu, pelem, simbol-simbol, ka yang laeng par kasi jelas dia pung riwayat.)*

**07. JAMAAT MANYANYI**

**08. MANGAKU KATONG PUNG PARCAYA (*lewat lagu*)<sup>2</sup>**

*(Langsung badiri)*

Beta percaya par Allah Bapa  
yang pung kuasa par samua-samua yang ada.  
Antua yang biking langit deng dunya ni.

Beta percaya par Yesus Kristus,  
Allah pung Ana satu areng-areng,  
yang jadi katong pung Raja.

Antua ada dalang Maria pung poro tagal Allah pung Roh,  
la lahir ka dunya biar kata Maria ni masi parawang.

Antua dapa siksa waktu Pontius Pilatus pegang parenta.  
Antua dapa salib, mati, la dapa kubur.  
Antua turung ka orang mati pung dunya,  
la hidop kombali pas akang pung lusa.

Antua nai ka sorga,  
dudu di Allah pung sabala kanang,  
la pegang parenta sama-sama deng Antua  
yang pung kuasa par samua yang ada.

Antua nanti datang dari sana  
par jadi hakim par samua orang  
yang masi hidop deng yang su mati.

Beta percaya par Allah pung Roh.

Beta percaya kalo Allah su pili katong  
par jadi Yesus pung orang-orang  
yang taika jadi satu di antero dunya ni,  
deng sama-sama tarima apa yang bae dari Antua.

Beta percaya kalo Antua kasi ampong katong pung dosa-dosa  
deng nanti kasi hidop katong pung badang kombali,  
la katong hidop tarus-tarus deng Antua.

Amin.

*(Langsung dudu)*

**09. MANYANYI PUJI TUHAN : (*Koor/VG/Solo/Trio/ka yang laeng*)**

**10. TANDA JAMAAT MINTA DANGKE**

---

<sup>2</sup> Tagal balong ada lagu par mangaku "Katong pung Percaya" dalang bahasa Malayu Ambon, jadi jamaat bisa baca "Katong pung Percaya" sama-sama.

Pmp Lagu : *Pimping lagu waktu jamaat kasi dong pung tanda minta dangke. (Bisa jua ada orang manari. Abis itu, diaken sombayang par jamaat pung tanda minta dangke tu.)*

**11. MANYANYI PUJI TUHAN :** *(Koor/VG/Solo/Trio/ka yang laeng)*

**12. SOMBAYANG PAR GAREJA DENG DUNYA :** *(Pandita)*

**13. LAGU PAR DAPA UTUS**

**14. ALLAH JANJI PAR ADA SAMA-SAMA DENG KATONG :** *(Pandita)*

----- **Dudu** tado la minta dangke dari Allah -----

*(Waktu pandita deng majalis-majalis bajalang kaluar la badiri di muka pintu, jamaat baku pegang tangang. Tarus pandita deng majalis-majalis pegang tangang deng jamaat, bagitu lai jamaat deng jamaat. Waktu dong samua ada pegang tangang, kantoria ka majalis yang pung tugas pimping lagu.)*